

आकाशवाणी

- बीजेपी दे सीनियर लीडर ते प्रधानमंत्री नरेंद्र मोदी होर अज्ज असम दे नलबाड़ी च चुनांस रैली करडन।
- पच्छिम बंगाल दी मुखमंत्री ममता बनर्जी होर अज्ज सिल्वर च अपने मेदवारें दे हक्के च प्रचार करडन।
- लोकसभा चुनांस दे पैहले गेड़ दे मतदान लेई चुनांस प्रचार अज्ज संझा मुक्की जाग।
- रामनौमी दा ध्यार अज्ज मुख भरें च मते उत्साह ते श्रद्धाभाव कन्नै मनाया जा'रदा ऐ। राष्ट्रपति, उपराष्ट्रपति ते प्रधानमंत्री होरें इस मौके सब्बनें गी ममारकबाद ते शुभकामनां दितियां न।
- संयुक्त अरब अमिरात च भारी बरखा कारण आम जनजीवन अस्त-व्यस्त, ओमान च बरखा कारण 19एं लोकें दी मौत।
- आईपीएल क्रिकेट च राजस्थान रायल्स नै कोलकाता नाइट राइडर्स गी द'ऊं विकटें कन्नै हराई दिता ऐ।

<><><><><><>

PM-Rally Assam

बीजेपी दे दिग्गज नेता ते प्रधानमंत्री नरेंद्र मोदी होर अज्ज असम दे नलबाड़ी च चुनाव रैली करडन।

गुवाहाटी दे बोरझर हवाई अड्डे पुज्जने पर प्रधानमंत्री हुंदा भव्य स्वागत कीता
गेआ। टीएमसी सुप्रीमो ते पश्चिम बंगाल दी मुखमंत्री ममता बनर्जी होर बी
अज्ज सिलचर च चुनाव प्रचार करडन। आकाशवाणी संवाददाता नै दस्सेआ ऐ जे
प्रधानमंत्री होर अज्ज विजय संकल्प रैली करिए उत्तर पूर्व च चुनाव प्रचार दा
शुभारम्भ करडन।

<><><><><><>

BJP-EC

भारतीय जनता पार्टी नै निर्वाचन आयोग दे सामने जगन मोहन रेड्डी हुंदा
अगुवाई आली आंध्र प्रदेश सरकार पर सरकारी मशीनरी दा गलत इस्तेमाल
करने दा आरोप लाया ऐ। बीजेपी दे महासचिव अरूण सिंह, ओम पाठक,
तेलगुदेशम पार्टी दे मिम्बर के. रविंद्र कुमार, जनसेना पार्टी दे अध्यक्ष एन.
मनोहर ते किश होर नेताएं कल नमीं दिल्ली च निर्वाचन आयोग च शकैत
दर्ज कराई ऐ। मगरा मीडिया गी संबोधित करदे होई अरूण सिंह होरें आखेआ
जे उनें निर्वाचन आयोग गी आखेआ जे ओह राज्य सरकार दे खलाफ इस बारे
जांच करोआन। उनें आखेआ जे आयोग अग्गे गुजारश कीती गेई ऐ जे ओह
पूरी चाल्ली साफ-सुथरे ते संजीदगी कन्ने मतदान कराने लेई संवेदनशील
मतदान केंद्रें पर वीडियोग्राफी कराने दी बवस्था करै।

<><><><><><>

Rahul

कांग्रेस दे वरिष्ठ नेता राहुल गांधी होरें चुनावी बांड आले मुद्दे गी लेइए कल प्रधानमंत्री नरेंद्र मोदी हुंदे पर तगड़ा हमला बोलदे होई इसी जबरन वसूली दा इक रूप करार दिता ते आखेआ जे एह धरती पर सब्बनें शा बड्डा भ्रष्टाचार आला घोटाला ऐ। कल केरल दे कोजीकोड़े च इक रैली गी संबोधित करदे होई उनें आखेआ जे इस आइ च बीजेपी नै बड्डे-बड्डे उद्योगपतिएं कोला करोड़ें रुपें दी वसूली कीती ऐ।

<><><><><><>

Last Day Campaining

2024 दे लोकसभा चुनावं दे पैहले गेड़ दे मतदान लेई प्रचार दा अज्ज खीरी ध्याड़ा ऐ। इस गेड़ लेई रैलियां, जलसे जलूस ते रोड शो वगैरा करने दा सिलसिला अज्ज शामी लै खत्म होई जाग। अतरूं 19 अप्रैल गी 21 राज्यें ते केंद्र शासित प्रदेशें दिएं कुल 102 लोकसभा सीटें लेई वोट पाए जाडन। अज्ज कीजे प्रचार दा खीरी ध्याड़ा ऐ, सब्बै पार्टियां अपने बड्डे-बड्डे नेताएं ते स्टार प्रचारकें दी मदद कन्नै मते शा मते मतदाताएं गी अपने पक्खै च करने लेई अपना पूरा जोर ला करदे न।

बीजेपी दे सीनियर लीडर ते प्रधानमंत्री नरेंद्र मोदी होर अज्ज असम ते त्रिपुरा च रैलियां करडन जिसलै के कांग्रेस दे सीनियर लीडर राहुल गांधी ते समाजवादी पार्टी दे अखिलेश यादव अज्ज गाजियावाद च चुनां प्रचार करडन। कांग्रेस दी स्टार प्रचारक प्रियंका गांधी होर अज्ज सहारनपुर च रोड शो करडन।

<><><><><><>

Naxalites

छत्तीसगढ़ कांकेर जिले च कल नक्सलियें ते सुरक्षा कर्मियें बश्कार टाकरे च 29 नक्सली मारी दित्ते गे न। इस टाकरे दौरान 3 सुरक्षाकर्मी घायल होई गए न ते हथियारें दा इक बड्डा जखीरा उस थाहै परां बरामद कीता गेआ ऐ। बीनागुंडा ते कोरोनार ग्राएं बश्कार हापातोला जंगल च रातीं 2 बजे एह दो तरफा गोलाबारी उस्सलै शुरू होई जिसलै सीमा सुरक्षा बल ते राज्य पुलस जिला रिजर्व गार्ड दी संयुक्त टीम नक्सल विरोधी कार्रवाई पर हे। आईजीपी बस्तर रेंज, सुंदरराज पी. होरें आखेआ जे एह कार्रवाई सीपीआई मोओवादी शंकर, ललिता, राजू ते किश दुए साथिं दी मौजूदगी दी सूह थहोने मगरा कीती गेई। वरिष्ठ पुलस अधिकारी नै दस्सेआ जे 29 माओवादियें सने ए.के-47, एल.आर, इनसास ते 303 राइफलें जनेय हथियार बड्डी तदाद च बरामद कीते गे न।

<><><><><><>

Prez. Ramnavmi

राश्ट्रपति द्रौपदी मुर्मू होंरें देशवासिं गी राम नौमी दे पावन ध्याड़े पर शुभकामनां दितियां न। अपने सनेय च राश्ट्रपति होंरें आखेआ जे राम नवमीं गी भगवान राम जी दे जन्म दिन दे रूपै च मनाया जंदा ऐ जेड़े के असेंगी सच्चाई कन्ने सेही रस्ते पर चलने दी प्रेरणा दिंदे न। राश्ट्रपति होंरें जोड़ेया जे मर्यादा पुरूषोत्तम प्रभु श्री राम होर विनम्रता, धैर्य ते बहादुरी दे आदर्श न। उनें निस्वार्थ सेवा, दोस्ती ते बचनबद्धता जनेय मुल्ये आस्तै उच्च मानक स्थापित कीते।

<><><><><><>

VP-Ramnavmi

उपराश्ट्रपति जगदीप धनखड़ होंरें बी राम नवमीं दी शुभकामनां सारें गी दितियां न। उपराश्ट्रपति होंरें आखेआ जे भगवान श्री राम जी दा जीवन सारें आस्तै इक सिक्ख ऐ जे असेंगी सेही रस्ते पर चलदे होई मुश्कले गी सहना आना चाइदा ते हर चाल्ली दे हालाते च इकजुट रौहना चाइदा। भगवान राम जी दे आदर्श असें सारेंगी सदिएं थवां प्रेरित करा रदे न। उनें आशा कीती ऐ जे हर देशवासी भगवान राम हुंदे आदर्श पर चलै ते मजबूत, खुशहाल देश आस्तै अपना योगदान दे।

<><><><><><>

Ramnavmi Greetings

प्रधानमंत्री नरेंद्र मोदी होंरें रामनवमीं दे मौके देश दे बसनीकेँ गी बधाई दिती ऐ।
उनेँ आखेआ जे भगवान राम हुंदे अयोध्या मंदर च विराजमान होने मगरा एह
पैहली राम नवमीं दा ध्याडा ऐ। अज्ज अयोध्या च राम नौमीं मनाने आस्तै
भव्य आयोजनेँ दी धूम रौंग। उनेँ आखेआ जे 5 शताब्दिएँ बाद अज्ज असेँगी
अयोध्या च राम नौमीं मनाने दा मौका थोआ ऐ ते एह अवसर केई सालेँ दी
कड़ी तपस्या, समर्पण ते देशवासिएँ दे बलिदान दा गै फल ऐ।

<><><><><><>

Ramnavmi Ayodhya

भगवान राम लला हुंदी प्राण प्रतिष्ठा दे बाद अज्ज अयोध्या च पहली बारी राम
नौमी दा पावन ध्याडा बड़ी धूमधाम कन्नेँ मनाया जाग। श्रद्धालुएं दी खासी
भीड़ गी दिखदे होई इस थार सुरक्षा दे कड़े इंतजाम कीते गेदे न। बड्डी गड्डिएँ
दी आओजाई पर रोक लाई गेई ऐ। मेले आली थाहर पर नेड़में सर्किट टी.वी ते
ड्रोन कैमरे राएं नजर रक्खी जा रदी ऐ। अस्थाई स्वास्थ्य केंद्र ते साफ पीने दे
पानी दी बवस्था केई थारें उपलब्ध कराई गेई ऐ। भगवान राम मंदर पूरी दुनिया
च श्रद्धालुएं दी तदाद दे सरबंध च सब्बनेँ शा अग्गे ऐ ते अज्ज राम नौमी दे
मौके अयोध्या च रिकार्ड तोड़ श्रद्धालुएं दे पुज्जने कन्नेँ इतिहास रचेया जाग।
राम लला जी दा मंदर फुल्लेँ दे रंग बिरंगी रोशनी कन्नेँ सजाया गेदा ऐ।

अज्ज शुभ मुहुर्त दपैहरी 12 बज्जिये 16 मेंटे पर राम लला हुंदे मत्थे पर सूरज दी किरणा पौडन ते इस ऐतिहासिक ते अद्भुत दृश्य गी दिक्खेआ जाग। एहदे कन्नै पूरी अयोध्या च भगवान राम जी दे जन्मोत्सव पर भव्य कार्यक्रम आयोजित कीते जाडन ते वेद मंत्रे दा उच्चारण कीता जाग। भगवान राम जी गी 56 पकवाने दा भेग लाने मगरा श्रद्धालुएं च प्रसाद बंडेया जाग।

<><><><><><>

UAE-Oman

संयुक्त अरब अमिरात च बड़ी मती तबाही मचाने आली बरखा करी आम जनजीवन बुरी चाल्ली प्रभावित होआ ऐ। उत्थे दियां ज्यादातर जरनैली शड़कां पानी कन्नै भरोची गेदियां न ते जीवन लगभग थमोई गेदा ऐ। तोआई ओमान च बी मुसलाधार बरखा करण उत्तरी ऐश शरकियाह ते अदम च 19 लोके दे मारे जाने दी खबर ऐ।

<><><><><><>

IPL

आईपीएल क्रिकेट 2024 दा 31मां मकाबला कल राजस्थान रायल्स नै खीरी गेंद पर जिती लैता। जोस बटलर नै अपनी 107 रन्जे दी पारी कन्नै टीम गी इस सीजन दी 6मीं जित दोआई ते 12 अंके कन्नै तालिका च राजस्थान दी पैहली थार बरकरार रक्खी।

कोलकाता नै पैहले बल्लेजी करदे होई 20एं ओवरें च 6एं विकटें दे नुकसान पर 223 रन्ज बनाए जेदे परते च राजस्थान नै पूरे 20 ओवर खेडदे होई 8एं विकटें दे नुकसान पर 224 रन्ज बनाए। दऊं विकटें कन्नै मैच जिती लेता।

<><><><><><>

Weather

मौसम विभाग नै 18 कोला लेइए 21 अप्रैल तोड़ी उत्तर पच्छमीं भारत च गर्जी चमकिए बरने ते अंदी झक्खड़ झुल्लने दी पेशनगोई कीती ऐ। जानकारी मुजब कश्मीर घाटी, जम्मू संभाग, लद्दाख, गिलगित, बाल्तिस्तान, मुजफ्फराबाद, हिमाचल प्रदेश ते उत्तराखंड च हल्के कोला दरम्याने दर्जे दी बरखा पौने दे असार दस्से गे न।

<><><><><><>